

黔南叢書

第五集第二冊

默南林取書第五集

默

壺齋

據小方壺齋本校印

黔囊

黔南叢書第五集

清望江檀 萃著

自武陵而西皆灘河其險怛心其奇駭目經綠蘿山明月池白壁灣因憶酈道元所稱頽巖臨水縣蘿鈎渚數詠幽谷浮響若鐘風籟空傳泉響不斷形容曲肖行數日則所見愈多愈奇幾有前魚之厭矣

桃源洞在水南岸絕壁之下微有門形其半沒水洞之上爲爛船洲後人因爛柯之說而附會之耳黃道真出洞得船便扶向路豈爛而可載乎善乎坡公之言蜀青

城老人村有五世孫者桃源蓋此比憶天壤間若此者甚衆不獨桃源然不過幽僻山村疑仙者過求之耳酈道元注水經蒐奇列異不及此事則洞門不在水崖而洲在當日必無此名故也

辛女巖有石屹立高辛氏所化對岸巖間機一船一乃其遺蹟然溪峒巖間此類頗多或存朽木或懸羽箭或貯箱匱人多以仙人屋命之疑不然也大抵昔時五溪左右悉是蠻居阻險懸崖人力不及攻之者用木舟載土自頂縋下深入其巢亦兵法之一凡今殘具皆當日

所遺巖高風日故不朽至今

沅水中灘勢險絕數十百處其最著者莫如清浪灘黃
絲滾洞洞傍南崖居水之底歧水之半若泄尾閘往不
可極北巖懸峭危磯怪碣探頭河中齧噬吞吐湧飛波
怒逼使南趨南則迅復涌湍汨瀾漂疾情難驟合怨嬗
呼號麾之退恧其勢兩窮恚嗔誼聒邀欲趨倦喘困沫
濡千萬繭絲縷重聯疊蹙縮堆盆如待洗滌翕欬分劈
因而散舒如受娃牽如受風靡收斂展放暴日宿井淫
之漉之沸渭濯濯彼奔此堵中分一線下瀨涖涖船行

其間隨勢曲折畧北則落盤渦觸石立碎畧南則少縱
卽逝杳不可見矣

萬卷書巖踞平溪之口峭壁千尋石文折疊如架緇帙
因以名之其下則百丈澄潭水深不測鮮鱗濺喜充牣
其中一網所獲其數難陳水族之珍甲溪峒矣昔沒人
尋味入其阻深極深之庭巖如水府珠窗玉砌炫焜通
明牙架礚棖堆盈錦贍啓卷竊眡字作魚形盡不可識
旁顧桁上寶甲一旅細蹙黃金四顧無人因盜而服之
一出洞門便濯水內自視所擐已成魚服揚髻鼓鬣漸

忘所之噴沫飛濤逐曹東厲紛紜猛氣倚化震鱗失其
故行了不自惜貪遊巨水乃至洞庭適遇一士拘而撻
之曰非我族也領至一處投於階下但聞殿上傳言是
亂吾書又盜吾服其剝而尸之猛校猙獰刮批頭背舊
形俄復棄而汎之若死若生驚魂未定漁舟載起久乃
徐蘇細吐所由莫不詫歎乃知神明之域秘藏靈文所
以鎮壓蠻荒奠茲川瀆故玉書金檢無處無之守一隅
者不足與論也

北山在青溪城內高數千仞上有瑞雲峯雲出峯頂靄

靄舒空五彩相宣結爲繖蓋羣真胥會天樂琅琅秋月
清澄涼颼微警往往子夜或有見之不爲常也至若靄
天曉霽雲氣旋歸或雨信方來俄看滃勃輕素濛濛散
布山腰且及於趾而署居山半窗扉戶牖悉見雲生坐
對豐隆如讀長卿大人賦飄飄然有遊汗漫之意不復
知案牘之勞也

青溪城東五里許有犀池池廣數十頃四山環繞絕無
水口其水與黃河通源四時渾濁不露清冽之色池多
鯉魚其味絕似黃河冰鯉畧無差別此池踞沅水南岸

重岡複阻不與沅通清濁各分畧不相涉且憑藉甚高
降尊殊勢每天時晴亢灘石僅沒馬脰而池水或暴長
丈餘白馬素車軒騰奮厲抑蠻霖熨漲冲溢沸騰沅水
突高芷香盡沒而池水或轉減盈丈鯨吞鼉噏不識所
歸蓋其盈虛隨河消長故也池之北隅尤深無底時有
靈犀出沒善泅者亦不犯淺孺平平峭石聳拔水減則
碧蓼成林可遊可坐水溢則張牙露齒奇怪駭人黔中
山水之幻非可以常理測
青溪之西有關曰雞鳴土人傳漢關將軍至此聞雞而

宵征得脫於難立廟祀之疑前將軍未嘗至此而滇黔
間多有關索遺蹟索卽前將軍之子國志有缺或未備
敘清浪故武陵地屬吳而將軍或從武侯南征分麾畧
地至此則此關界吳蜀矣峻壁巉巖俯瞰清江深不可
測巉巖開道闊有丈餘絕壁層陰俯蓋其上蔽虧天日
如行阿字間高坡淩峭桀豎河隅上起小樓軒窗四敞
奇峯傀嶺盡歸指顧時因禱雨憩息其間內熱飲冰對
茲頓釋地當孔道不見囂塵則山水之勝也清浪驛舊
繞北山之後平坦迂迴旋改而由此關石險峻行旅維

艱明宏治時僉事趙晟來鎮茲土委千戶顧倫重加修
鑿險者以平自關而西道臨江潯旣汙且隘潏蹶盈盈
乃俾指揮滿瑄陳景率旅夷培成如砥至今賴之

田仙洞在雞鳴關之西懸崖百仞洞踞崖顛曾有老巫
逐神入洞但見巨蟒跼伏其中長不可極巫家祈弭呼
爲田先生僕以往代雄長茲土者多田氏先生或以貴
袖而慕元風棲心福地宿應虬精景福作興旰饔發越
澤我烝人至今是賴秋初亢旱僕因牒之惟先生道風
元邈養素全真康濟爲懷曲從民欲有司憫雨走伏丹

崖目斷千尋望之難卽回車入郭甘盤徐隨留俞隕光
何以過此但電索罷絡旋放驕陽炎起媧鑪漏天俄補
已虛前澤渴思後施以永終惠母作神羞由是大雨連
朝人稱田仙雨

青溪縣治距北山之趾官廚在署之西龍泉一泓長流
不竭列竹接引如聯珠琲注釜盈盈其味甘香工調五
熟餘則瓊淳甕瀋澡杯雪琰自發晶瑩蠲濁流清不須
擔汲蜀江之膏較此何勞故庖丁取便焉此泉下注迭
爲三坎匯爲小池正對窗間前賢於此列植芙蕖花大

如斗每瓣龍文隱起南颺微扇盈署芳馨時引索郎笑
看彼美雅稱仙吏亦時會使然今則池已涇淤茹蕒匿
影泉尙仍昔一插爲怡會旱魃爲災流亦遂涸因爲祝
之綵筵初撤汨汨然來泉真有龍邪龍果有知邪抑會
逢其適邪龍乃神物乃蟄身荒僻之署邪越日大雨斯
龍之功然不自功也

金星石出思州星石潭中硯材取之頗難水洞蝸旋灣
環黯黯逮於潭底星光燦爛倒影返射洞壁通明必善
沒者腰斧鑿而下與汨俱入與湧偕出又必能如泉客

鯨人水居不畏真人之息機發於踵而後可任此役矣
出而琢之礪之礪之砥之麤犗外錫精光內發如濃雲
鬱興中露電影一線倏歛閃爍若有若無此真金星也
工於發墨貯水不乾辛卯之春李上舍貽以祖行面徑
六寸圓如滿月而青霞掩蓋微射金波匣以沙柵雕刻
古雅此木土中自長千年不宿黝如古石墨簾颺几淨
時發清馨希世之寶也黔地上應鬼宿故號鬼方鬼宿
屬金中有積氣則細星如沙之至集也石爲星子正含
鬼金其金星暗伏則星沙之餘氣凡鬻於市者皆小溪

之贅眈亦有金星而色如壞雲死灰用以濟產難可矣
不足珍也此石生蠻荒谿峒名不甚著貴耳者目而陋
之然幸如是足以自全其天令如端歛騰聲則百方涸
泉斲削地脈役鬼疲民且貽斯邦之辱

飛山在思州南志謂以神祠得名神祀英惠侯楊再思
稱飛山者祠在城北香鑪飛至此移祠而以飛山名殆
非也按水經注流水東逕無陽縣南臨運水水源出東
南岸許山西北逕其縣南注於熊谿熊谿南帶移山山
本在水北夕中風雨旦而山移水南故山以移爲名細

核形勢則思州之河其上流則運水而下則熊谿也思
州飛山乃古移山其神或不應屬楊再思再思當楚馬
氏時據誠州稱刺史則靖州也州城西北有飛山飛山
之祀徧於黎平鎮遠天柱皆誠州近境故祀再思以此
而訛耳熊谿不入五谿之數雄谿則數焉故水經注分
列之雄谿則今會同之洪江相去甚遠矣

自白羊塘西行六里卽上大相見坡而中而小三重迭
起中坡微偃不及首坡尾坡之尊從首尾視中如銀釜
難雲玉膏泡起從中分顧首尾如華巖雲海對岸樓臺

至於客子勞人津梁疲極行歌遣鬱前後招呼數里之遙迭音咫尺此間苗棘善於山歌翻譯白狼卽成風雅歷茲感惻用寫其聲焉相見坡前相見愁勞人到此淚交流何時學唱苗歌好固脈呵交可自由草食之獸不疾易藪水生之蟲不疾易淵惟適其所適也

東坡之東爲飛雲巖山高數百仞古木重陰青攢碧聚層排上下次第參差繞以白雲如玉宇瓊阿鱗次天表巖距山半其面向明豁襟內深崖厖上覆石乳凝液變化萬端秦馬趙牛不可名狀龍拏虎臥獅奮象奔恍惚